

魯齋集附錄補遺
三





魯 齋 集

附錄補遺

(三)

王 柏 撰

王雲五主編
雲集成初編

魯齋集
附錄補遺
三冊

中華民國二十五年十二月初版

撰者 王

柏

發行人

王雲五
上海河南路五

印刷所

商務印書館
上海河南路

發行所

商務印書館
上海及各埠

壽

魯齋集卷之八

宗忠簡公傳

宗澤字汝霖。婺之義烏人。天姿沈毅。識度深遠。才敏而用周。至大至剛之氣。始終不屈。讀書過目不忘。尤邃於春秋左氏。程文有心不可欺之說。有司喜曰。吾爲朝廷得人矣。登元祐六年第。宣仁聖烈垂簾。有詔對策。限以字數。同輩相告。必如詔。可中程。公曰。事君自今日始。豈可希前列。効寒蟬乎。遂力陳時病。幾萬餘言。八年。以將仕郎調大名府館陶縣尉。嘗攝邑事。吏以少年易之。及聽訟。迎刃而決。不淹月。大治。呂惠卿移帥鄜延。以幙屬辟公。力辭不受。調衛之龍游令。丁內艱。服除。調膠西令。按治宿姦。不畏強禦。捕羣盜數十。焚其廬。威譽赫然。丁外艱。服除。調晉州趙城令。言於朝曰。趙城前有并河汾陽之險。後有晉絳蒙坑之固。左霍邑。右太行。沃野百里。實用武之地。乞援楚之漣水。灌之德清。命以軍額。屯兵以備不虞。不報。公曰。今固承平無虞。他日當有知吾言者。政和三年。知萊州掖縣。部使者以朝命科取牛黃。公力拒得免。公曰。吾之爲邑。始之以信。濟之以威。信既孚矣。威亦何用。五年。通判登州。時朝廷遣使由海道與女真結盟。公憂形于色曰。軍衅自此始矣。有道士高延招。倚林靈素凌蔑郡邑。公窮治其罪。不顧。及公丐祠而歸。結廬山水間。有終焉之志。道士以公改建神霄宮。不當訴于朝。而靈素主之。遂褫秩羈置鎮江。公聞命就道。

無纖芥慍。宣和三年，始復承事郎，就差鎮江府酒官。靖康元年，北虜犯闕，既退，詔侍從舉知御史中丞陳過庭以公薦。八月，召擢宗正少卿，使虜，以和議名。公曰：「虜情不可測，名不正則徒取辱耳。」請改爲計議使。且謂人曰：「此行必不返，問其故，則曰：『某豈能屈節虜庭，上辱君命邪？』必死賊。」議者以公太剛，改命劉岑。九月，出知磁州。時太原失守，眞定被圍，卽日單騎渡河，繕城浚隄，治器械，募義兵，增價入粟，爲必守計。不逾月而備上疏乞邢、洛、磁、相、趙各募精兵二萬，教習之，使常有十萬兵，遞相爲援。上嘉之，諸郡議不合，虜再南，驚公大治兵，與滑瀋相犄角。虜知有備，乃東趨大名魏縣。由李固渡渡河，乃分兵攻磁。公命神臂弓射退，出義勇追斬數百級，士氣益奮。時王雲靖康王使虜和，至磁，公迎謁曰：「聞虜已由李固渡渡河矣，萬一如肅王爲虜所留，雖悔何及？力請輟行。」會百姓亦怨王雲，邀王徇虜殺王雲，遮馬留王。王遂還相州。虜已圍京城。十一月，上除王爲兵馬大元帥，公與汪伯彥爲副元帥，以師入援。十二月丁丑，公與裨將秦光弼、張德邀虜于李固渡口，夜擣其壘，破三十餘寨。翌日，王檄諸郡發兵會大名。癸未，公至大名。王議師所向，公請直趨開德，入解京城之圍。汪伯彥猶以和議難之。獨王以爲然。戊子，公提兵二萬，趨開德，擊虜十三戰皆捷。會京城遣張激持詔書，同虜騎叩開德，問王所在。且言虜再議和，援兵未宜遽進。公曰：「此爲虜所脇，來款我耳。」命壯士射之。虜遁。已而王命與黃潛善分統勤王諸軍。王檄諸帥以虜懷詐僞和，實杜四方之師，宜審料敵勢，可進則進。公示諸將曰：「王已酌知虜情，吾等可坐視乎？」請王徧激諸道，約日同進。時趙

野爲北道都總管。范訥爲河北河東宣撫使。合軍南京。號宣總司。偃然自衛。殊無進兵意。公移書以大義切責之。皆不答。向子諲駐宿趙子崧守陳。何志同守許。閻丘陞守濮。曾懋守曹。列屯環京城。無敢動。翁彥國以經制使總東南兵。駐泗不行。公獨以孤軍進至南華。命裨將陳淬出虜不意擊之。虜自宛亭逼興仁府。分兵寇開德。公遣孔彥威與戰。又破之。公度虜必犯濮。密戒權邦彥爲備。虜果至濮。公遣二千騎爲援。敗之。虜復向開德。邦彥彥威合擊。又破之。公親率諸軍進衛南。曰。兩國旣和。我欲入覲君父。遂揮而前。處陳兵以待。公曰。今前後皆虜壁。進退等死耳。當死中求生。人人爭奮。無不一當百。虜遂大敗。斬首數千。虜益生兵。陽敗而卻。公曰。彼十倍於我。一戰遽卻。是必有謀。若襲我則殆矣。卽徙軍南華。虜果夜至。得空壁大驚。次日公自南華過河襲擊。又敗之。公所得俘囚。問京城動息。又得王檄。知二聖北狩。天族偕遷。公北向號慟。卽日自臨濮趨滑州。由黎陽大伾邀乘輿。孤進戰。他軍無一會者。及聞張邦昌僭位。卽回戈內向。先遣健步持檄慰撫京城。又得王書。言僭僞義當征誅。聞其出於權宜。未可重擾京城。不若按甲近畿。移書問故。候得其實。討之未晚。公卽移師觀衅。且復王書曰。姦臣邦昌竊據寶位。改元肆赦。止勤王兵。篡跡顯然。自古姦臣。其初未嘗不僞爲謙退。中藏禍心。今二聖諸王北去。惟大王在天。意可卜。正宜有以歸天下之心。不可緩也。及聞都城反正。貽書于王曰。今日國之存亡。在大王行之得其道。與不得其道耳。所謂道者。其說有五。一曰。近剛正而遠柔邪。二曰。納諫諍而拒詔諛。三曰。尙恭儉而抑驕奢。四曰。體憂勤而忘

逸樂。五曰進公實而退私僞。公謂人曰。結怨王之左右矣。不恤也。又累表請早決大計。王命公摠諸將於長垣。韋城。衛南。南華屯衛。五月。王卽位于南京。詔公入對。一論人主不可以喜怒爲賞罰。二論人主職在任相。顧於稠人廣衆之中。不以親疎。不以遠近。虛心謹擇。參以國人左右之言。爰立作相。毋使小人參之。三論臣下有懷姦藏隱。嫉賢蔽善者。當使耳目之官。灑心彈糾。毋有所隱。上納其言。將留公。黃潛善。汪伯彥惡之。出公知襄陽府。復有割地取和之議。公上疏曰。陛下初紹大統。奈何遽聽姦臣之言。欲割地以啖虜乎。前日靖康姦臣。未嘗議遣。朝說一言以告和。暮獻一說以乞盟。詞卑禮厚。惟虜是徇。終有前日之禍。宜人臣弗與虜共戴天而俱生。臣意陛下亦赫然震怒。一洗前日之恥。未聞有所號令。作新斯民。豈可復徇姦邪之議哉。爲是說者。既不忠不孝。又壞天下忠義心。而褫其氣。臣願躬冒矢石。爲諸將先。上壯其言。改知青州。會李綱入相。公與語及國事。慷慨流涕。綱爲上言。綏集舊邦。非澤不可。遂徙知開封府。是時虜兵初退。守備廢圯。盜賊縱橫。公下令曰。爲盜者。賊無輕重。並從軍法。由是羣盜屏息。人情始安。王善者。河東之巨寇也。領兵七萬。叩濮州。謂京城殘破。不足語勇。直欲據之。公自料勢未易敵。戒都統以下守城。吾將親招之。單騎竟造賊巢。善亦訝公之來。約與公會。公略不出一語。但執其臂。仰天號慟。徐曰。朝廷二百年涵養。當危難時。無一人出爲時用。使當時如有公一二輩。豈復有今日之患。今正立功之秋。王善爲公忠義感動。亦同聲而泣。且曰。敢不効力。公附耳語之曰。來日當以節度使相處。諸將謂公此行。不復返矣。

及公歸。諸將出迓。公曰。事畢矣。善隨以狀至。欲不領衆歸降。且有解甲帶甲之請。公書從便二字。善益心服。越三日來降。衆疑不決。人情恟。公獨信之篤也。善以五百甲騎從。餘皆解甲。既至。左右止之曰。此留守司門。擅入者處斬。善乃下馬趨入拜于庭。公繼以禮接之。曰。公禮相見。不得不如此。延之以飲。臨行曰。昨已許公節度使。先授照帖。當卽具奏。善大喜。且請到寨撫諸將。公許之。不疑。既入寨。第賞有差。自是軍聲大振。又有王再興掠西京。李貴往來淮上。楊進者。號沒角牛。及王進等頭項人。所至侵掠。公徧遣人諭以禍福。招來之。羣盜素服公名。相繼而至。楊進者。尤所敬慕。公曰。軍中老弱婦女。久被驅虜。吾不忍其無辜。宜盡釋之。進等奉命。諸軍所放。幾二萬人。楊進屯城南。王進屯城北。二人氣不相下。一日。領衆相拒于天津橋。都人頗恐。公以片紙喻之曰。爲國之心。固如是耶。當戰陣立功。勝負自見。二人相顧。慚沮而退。公之去磁也。而州事付兵馬鈐轄李侃。中軍將李世隆。與將校郭進。殺侃爲亂。至是與其弟世興。將三千人歸。公世隆入拜。公詰其亂之由。世隆詞服。公笑曰。河北陷沒。而吾宋法令。上下之分。亦陷沒耶。命引出斬之。時衆兵露刃于庭。世興佩刀侍立。左右皆悚。公徐語世興曰。汝兄犯法當誅。汝能奮志立功。足以雪恥。世興感泣。其後虜犯滑。公謂世興曰。試爲我取之。世興欣然受命。勵衆至滑。掩虜不備。急攻之。斬首數百。以歸。公復厚賜之。丁進者。亦巨寇也。其初來降。人情鼎沸。謂非眞降者。或請以兵陰衛。公曰。不然。正當披心腹待之。雖木石可使感動。況人乎。及進至。公慰勞存撫。又呼首領者數人。飲食之。待之如故吏。明日。按其

寨進益感畏。黨有陰結爲亂者。進自擒殺之。有相率遁者。進自追治之。馬臯者。進之次也。每戰必先登。一日傷而還。公方撫勞。而羽報又至。公曰。誰可代汝行者。臯曰。非臯不可。裹瘡而前。數日擒一酋而歸。趙海亦招賊之雄也。屯板橋。輒暫路設橋。以阻行者。閭勅百芻者八人。過海營。海怒曰。我畏閭太尉邪。悉櫟之。偵者以聞。公呼之。海以甲士五甲從。公方接客。遽語曰。殺芻者誰。海曰。無之。出報狀示海。具服。命械繫獄。客曰。姑徐之。奈甲士何。公曰。何怯邪。治海者某。諸公何預。喻次將曰。領衆還營。趙海已械送所司。告偏裨善護卒伍。明日誅海。聞者股慄。會公拘囚虜使。議者紛然。獨許景衡言。臣聞宗某之爲尹。政術卓然過人。誅鋤強梗。撫循善良。都城帖息。莫敢犯者。又方修守禦之備。歷歷可觀。臣雖不識其人。竊用嘆慕。開封乃宗廟社稷之所在。苟欲別選留守。不識今之縉紳。其威名政績。亦有加於澤者乎。伏望上爲宗社。下爲生靈。特賜主張。厚加任使。疏入。上大悟。封示公。公感上知。益自奮勵。且造決勝戰車千二百乘。每乘五十有五。人十乘爲隊。坐作進退。周旋曲折。可以應用。又據形勢。立二十四壁於城外。駐兵數萬。往來按試。周而復始。沿河鱗次爲壘。結連兩河山水寨。及陝西義士開五丈河。以通商旅。京畿瀕河七十里。命六十縣分守。開濠植鹿角。守備已固。乃上表略曰。今逆胡尙熾。羣盜繼興。比聞遠近之驚傳。已有東南之巡幸。此誠王室安危之所係。天下治亂之所關。慮增四海之疑心。謂置兩河於度外。因成解體。未諭聖懷。不報。又疏云。回鑾汴京。是人心之所欲。妄議行幸。是人心之所惡。京師乃祖宗二百年基業。今陛下一歸。王室再造。

中興之業復成。每疏奏上。以付中書。黃潛善、汪伯彥皆笑以爲狂。張慤獨曰：「如澤之忠義，若得人，天下定矣。」二人語塞。十二月，虜駐兵于河之北，稍稍南渡。西犯汜水，北侵胙城。時擾滑瀋，公所屯河上諸寨，欲併兵禦之。因乞濟師。或曰：「賊鋒未易當，不若堅守自固。」公曰：「去冬之變，正坐此也。命統制劉衍趨滑，劉達趨鄭，各與卒二萬，戰車二百乘以往。初，岳飛犯有司，將正典刑。公一見奇之，曰：「此將材也，不加之罪，留之軍前。至是遣爲踏白使，以五百騎授之。」曰：「汝罪當死，吾釋不問。今當爲我立功，往視敵勢，毋得輕鬪。」飛謝罪，稟命鼓勇而前，竟與虜接，敗之。公喜擢統領。後遷統制。自是每出必捷。建炎二年正月，虜復自鄭抵白砂鎮，距京城四十里。都人恐甚。僚屬議守禦之策。公方延客圍碁，談笑自若。衆不敢言而退。各以己意部分兵。伍撤城隍之梁，乘城而備。公曰：「何張皇如是？」命諸軍解甲歸營。曰：「吾遣劉衍必能禦寇，復選精銳數千益之。」潛戒曰：「宜繞出虜後，設伏以待。」伺至擊之。又諭吏曰：「上元在邇，可舉舊例張燈。」因弛夜禁。士民遊觀如平時。虜不敢進，衍與戰大破之。遂復延津、胙城、河陰，收其輜重。甫及收燈，捷書已至。衆益大服。時有詔，諸路兵馬以勤王爲名，因聚爲寇，議所以杜絕之。公上言曰：「向者京城被圍，天下忠臣義士憤痛爭奮，越數千里勤王。當時大臣無謀，不能撫而用之，致有前日之變。勤王之兵，例皆撫棄犒勞，賞給不露，流離困死，弱者淪於溝壑，強者變爲寇盜。豈其本心皆上之人無以處之故爾？今乘輿移蹕淮甸，中原民無依歸，故姦究乘釁而起。且河東河西不肯從虜者，皆自保山寨，黥其面，各立名號，以堅報國之心。今所旂黃榜，

有云。遂假勤王之名。公爲聚寇之患。如是則勤王者解體。而河東河西。民皆失望。臣固知非陛下之本心。乃代言者不能推廣德意。失言。願別降詔。以慰元元。二月。虜犯西京。公命統制官李景良。閻中立。郭俊民等。領兵萬餘。所趨鄭大。戰爲虜乘。中立死之。俊民降虜。景良南遁。公捕得之。曰。一勝一負。兵家之常。不勝而歸。罪猶可恕。私自逃遁。是無我也。兵法固如是邪。命斬之。繼而俊民與虜將史官人。燕人何仲祖。王義等。以數百騎直抵八角鎮。與丁進遇。擒之。初欲持書誘公。旣生致麾下。公曰。郭俊民。吾統兵官也。失利就死。尙可爲忠義鬼。後有知者。不失血食。今全軀苟活。反爲虜人用。何面目見人乎。命斬之。謂史官人曰。京城不守。主上巡幸。領重兵在近畿。命我守此。有死而已。何不以死敵我。反爲兒女子語。脇我邪。亦斬之。謂何仲祖曰。爾本吾宋人。脇從而來。豈出得已。犒而縱之。虜又犯滑。公曰。滑衝要必爭之地。失之則京城危。不欲再勞諸將。我當自行。梁州防禦使張撝。請自效。公大喜。卽以銳卒五千授之。撝至滑。率將士迎敵。虜衆十倍。或請少避之。撝曰。退而偷生。何面目見宗元帥。鏖戰至暮。虜少卻。公遣統領王宣。以五千騎往援。未至。撝再戰死之。後一日。宣與虜大戰于北門外。士卒爭奮。虜退河上。宣曰。虜必夜濟。收兵不追。及半濟而擊之。殺傷甚衆。公命載撝喪歸。爲之服緦。厚加賻卹。仍請于上。贈撝拱衛大夫。明州觀察使。錄其家四人。虜自是不復犯東京矣。王策者。遼之舊將。善用兵。虜以千騎付之。往來河上。公密遣統制官王帥正擒之。釋縛解衣。坐之堂上。喻以悟義。協討策感泣。誓以死報。且具言虜中虛實。公益喜。大舉之計遂決。時招

撫河南羣盜聚城下。又募四方義士，合百餘萬，糧支歲半。公聞西河州縣虜兵不過數百人，餘皆脇使胡服。日夜望王師之來，復上疏大略言：今之士大夫，曾不爲陛下思祖宗基業爲可惜。父母兄弟，徯望救援之意。西京陵寢，爲賊所據，未有寒食祭享之所，又不爲陛下思京師者。天下之根本，億萬生靈之塗炭。陛下早回九重，則天下靡有定止。上遣中使撫諭，時契丹九州人日歸中國者，公引近座側，推誠與語，期奮忠義，給資糧遣之。且賜以公憑，候官軍渡河，以爲信驗。各令持數百本，又爲榜文，散示陷沒州縣，及爲公據，付中國被虜在北之人，連結諸路豪傑，曰：事可舉矣。會諸將約日渡河，故表請上還京尤力。且言：丁進有衆數十萬，願守京城。李成願扈從還闕，楊進等領衆百萬，願北渡。茲三頭項人皆同寅協恭，共濟國事。陛下速歸九重，盜賊戎虜皆無足畏矣。不報。五月再上疏，且言：今城壁已增固，樓櫓已修飾，龍濠已開浚，兵械已定備，寨柵已羅列，戰陳已習熟，人氣已勇銳。蔡河五丈河皆流通，陝西、京東、滑臺、京洛蕃賊已皆掩殺。望陛下毋聽姦臣之言，以失兩河之心，沮萬民之氣。又奏曰：臣欲乘此暑月，追王彥八字軍，取懷、衛、瀋、相等州，遣王再興護西京陵寢，馬廣等取大河、洛相、真定，楊進、王善、李貴等各以所部分路竝進。旣渡河，則山水寨忠義相應者不啻百萬。願陛下早下還京之詔，臣當爲諸將先。則我宋中興之業，必可致。疏入，黃潛善等忌公沮之。公尹京幾歲，武備不擾而辦，屢出師剉虜，抗疏請上還京。凡二十餘奏，初述都人之言曰：陛下何不認我宗廟乎？何不眷顧我朝廷乎？何爲使我社稷無所依乎？何輕捨我生靈，使無仰乎？

是都人之望陛下。切切如此。中則斥大臣之姦臣。託曰時巡。意圖偏霸。忘宗廟朝廷之重。違天地神明之心。棄大一統之規模。毀二百年之基業。且天下陛下之天下。彼姦臣何恤於存亡。如京師陛下之京師。想儉安知夫去就。但知親屬歸在江湖。寧顧中原變爲夷狄。終則力陳其不忠不義者。持祿保寵。動爲身謀。謂我祖宗二百年大一統之基業不足惜。謂我京城宗廟朝廷府藏不足戀。謂二聖天眷不足救。謂諸帝陵寢不足護。謂周室中興不足紹。謂晉惠覆轍不足羞。謂巡守之名爲可効。謂偏地之霸爲可述。儲金帛以爲賊資。椿器械以爲賊用。禁守禦之招募。慮勇敢之敵賊也。倍保甲以助軍。慮流移之復業也。欺罔天聽。凌蔑下民。凡誤國之事。無不爲之。言極切至。而嫉者益深。公嘆曰。吾志不得伸矣。疽發病甚。諸將排闥入問。公矍然起曰。吾固無恙。正以憂憤成疾耳。而能爲我殲滅醜類。以成主上恢復之志。雖死不恨。衆皆掩泣曰。願盡死。諸將出。公曰。吾度不起此疾。古語云。出師未捷身先死。長使英雄淚滿襟。遂薨。實七月十二日也。年七十。遺表猶贊上還京。先言已涓日渡河而得疾。其末云。囑臣之子。記臣之言。力請鑾輿。了還京闕。大震雷霆之威。出民水火之中。夙荷君恩。敢忘尸諫。上已除公門下侍郎。御營副使。依前東京留守。命未下。而訃聞。贈觀文殿學士。通議大夫。諡忠簡。以杜充代公留守。都人請於朝。以公子穎得士卒心。請繼其任。詔以穎充留守判官。充無意於虜。盡反公之所爲。將士去者幾盡。兩河豪傑皆不爲用。穎力丐終喪。以歸葬于京口之峴山。公平生律已甚嚴。自奉甚薄。方謫居時。餽粥不繼。吟嘯自如。晚年俸入雖稍

厚食不重味。衣弊不易。曰。君父方側身膏肓。臣子乃安居美食邪。親戚故舊貧者。輒予之。家無留儲。同舍生林迪先公登第。音問不通者累年。一日。挈家謁公。繼以疾告。公往視。尙能以後事屬公。既卒。公恤其家。備至。以其女妻修職郎康森。且以己女妻森弟。以申親好。其子從公討賊。補官爲文登令。公之急義如此者。衆依公活者幾百人。死之日。風雨晦冥異常。連呼過河者三。無一語及家事。都人號慟。朝野相弔。出涕。三學之士爲文哭公者千餘人。子穎。終兵部郎中。孫五人。嗣益。嗣尹。嗣旦。嗣□。嗣安。曾孫十有五人。曾懋誌其墓云。

同祭北山何先生文

鄒魯云遠。天啓濂洛。理一分殊。以覺後覺。龜山之南。宗旨是將。羅李授受。集于紫陽。研幾極深。大肆厥功。縷析毫分。惠我無窮。有的其傳。鰲峰翼翼。孰探其源。遂通其釋。墜緒茫茫。孰嗣而芳。公獨凝然。精思不忘。莘莘學子。孰定其力。公獨屹然。堅守不失。衣錦尙絢。世莫我知。發揮師言。以會于歸。有毓斯和。誠意惻怛。有實斯踐。光輝四達。先皇永命。嗣聖旁落。進之太史。以輔帝學。詔書屢下。公志莫移。各盡其義。匪激匪隨。高風凜然。厲世範俗。鼎台吾道。云何不淑。嗚呼先生。壽考奚憾。嗟我後人。茫無畔岸。立志不勇。樞趨日稀。儀刑遽隔。悔不可追。春回萬象。月冷風清。忍奠斯酒。忍讀斯文。

北山行狀告成祭文

我昔問學，莫知其宗。有過執告，有偏執攻。淵原師友，孤陋莫通。有慨其慕，天修其逢。得公盛名，于船山翁。獲瞻典則，乙未之冬。立敬居志，首開其蒙。自是尺牘，載磨載礪。不憚往復，一告以忠。遠探濂洛，近述鰲峰。理氣之會，造化之工。仁義大本，聖賢大功。體必有用，和必有中。無疑弗辨，無微弗窮。豪分縷析，萬理春融。匪矯而異，匪阿而同。曰味厥旨，體于爾躬。必平而實，必拓而充。媮墮弗勇，霜鬢已蓬。卒未聞道，以此負公。幸公耆壽，身康氣沖。不聞公病，遽以考終。有邦殄瘁，吾黨閔凶。茫茫墜緒，卒業無從。歲月流邁，行卽幽宮。公之仲子，莫泄哀恫。抱公言行，囑筆哀情。強顏敘次，慨想音容。如持寸莛，來撞巨鐘。惟德之盛，惟禮之恭。蕪詞弗稱，有愧蟠胸。奉以薦陳，鑒此微衷。

祭趙星渚文

惟公蚤親有道，浚迪淵源。堅卻官牒，高蹈丘園。河洛所啓，考亭所論。探討玩索，如誦已言。審其將發，控制放奔。驗彼未發，培植木根。貌恭而安，言厲而溫。恢拓日廣，開望日尊。帝曰嘉哉，汝其通藉。時酣利祿，是獵是弋。孰嗜義理，是保是式。易退難進，翔而後集。翼翼道山，嚴嚴講席。浙水東西，亦駕熊軾。一念如春，一清徹骨。紫臺逼人，幡然去國。有嘔蒼古，有渚泓澄。地靈人顯，迹隱身榮。後學矩矱，斯世經綏。兩朝之眷，四海之名。胡不百年，而遽棄傾。舉朝失色，天子震驚。贈恤之典，有煒丹旂。未知卽惠，爲誠爲明。嗚呼哀哉，某束髮讀書，恨不立志。慕德實深，登門莫遂。公鎮天台，作成士類。乃撤臯比，束帛來賁。冒然而前，求所未至。一

見傾倒。若符若契。學既同方。合固以義。窮深極微。展也一致。歲云莫矣。踏雪告歸。叮嚀宿約。春以爲期。疾病事變。一諾差池。有懷斯愧。公心不移。書疏絡繹。使者交馳。乃請于朝。督命下貽。暨陟崇領。公已交麾。棠陰未改。有黯其思。己巳之秋。拜書寓里。聞公臥疾。英嗣報敗。曾未踰時。誨言累紙。慰此孤陋。不寐而喜。什襲珍藏。如古壘洗。十有大字。嚴正瑰偉。千載北山。夜號萬鬼。言志之傳。神幾之似。無極之妙。太和之始。家語之書。少母之祀。未終所疑。未訂厥指。水陸遙遙。尙期操几。誰謂絕筆。遽同麟史。斯文未喪。世道方毀。萬目睽睽。爲蒼生起。泰山曷頽。梁木曷圯。識與不識。莫不痛痞。有訃莫聞。有含莫匕。匍匐一慟。如刳斯趾。內省而疚。媿此生死。南豐瓣香。歸心久矣。有炬傾筐。有茗盈筐。東望長號。老淚滂只。湛然清明。鑒此哀誄。

祭徐彥成

嗚呼。自八行表公廬之望。逮移櫬分石筍之春。蔚蔚故家之喬木。森森玉樹之堦庭。雖芬敷而異圃。實一氣之流行。往歲奪其冢嫡。今年喪其元孫。豈曰蘭自榮而蕙自槁。我則同此痛而同此心也。矧予與子。自昔相親。憶子之幼也。玉雪可念。方子之壯也。老氣夙成。功緒沈著。志慮堅凝。颯颯霜穎。琅琅夜燈。或談古而忘寐。或兀坐而不言。尺度剪剪。風鑒稜稜。疾惡掀髯而張目。見賢色暢而神溫。扶義以竭其力。責善以傾其情。豈特一家之佳子弟。實爲吾黨之良友朋也。可謂得五行之貞淑。意其開萬里之修程。一夢不返。前所罕聞。割雙親之心膂。飛病婦之驚魂。風濤壯兮維楫失。大辰落兮梁棟傾。悵遺恨之襏積。空搔首於

冥冥。日月滔邁。卽幽戒辰。有梅花兮被壠。正露冷兮水清。何必豐碑於隧道。此卽千載之餘馨。思昔聽月窗之曉角。拄山行之老藤。不復共此風致矣。徒涕淚之交零。有肉在俎。有酒在尊。以酌爾釁。以祖爾靈。

河圖贊

河之圖兮。開天地蹟。五十有五兮。陰陽相索。惟皇昊義兮。肇端乎神畫。心妙契兮。不知其千萬年之隔。

洛書贊

洛有編兮。負文錫神。禹兮彝倫。夏商之季兮。汨堙。箕子載陳兮。皇極爲之一新。萬世之大範兮。存乎其人。

乾道御書贊

皇矣孝宗。聖德天縱。翼翼小心。親承大統。監觀王國。宗廟黍離。讎恥未復。版圖未歸。寐寤英材。弘濟大業。味爽丕顯。孜孜聽納。爰究爰度。是經是營。鳶飛魚躍。遐不作人。有赫其明。或黜或陟。破前拘攣。萬里咫尺。于弼于輔。于蕃于宣。不辟是憲。人物藹然。中興之際。於斯爲盛。維我先臣。恭承眷命。昔在乾道。試邑長沙。政聲上徹。召節亟加。入覲于庭。天顏開豫。股肱之郡。汝其綏撫。于嚴于信。宣化兩蕃。帝曰來汝。郎省經帷。晝旣訪問。夜出奎畫。貂璫駿奔。衣冠駭暗。帝意若曰。汝言有章。旣及治具。然猶未詳。盍罄汝忠。裨我政體。毋替朕命。媚于天子。雲漢昭回。臣拜稽首。對揚天休。昌言敢後。帝心聲聲。帝謨洋洋。求治之切。度越百王。威靈在天。遺烈在下。日月于邁。邈然今古。君臣之契。自昔所難。有進有退。惟義之安。驪珠陸離。三十有九。

既勒堅珉永鎮瑩阜神光發笥匪金厥籙惟忠惟孝百世其承匪忠曷勸匪孝奚則匪臣之榮惟皇之極
乾道九贊

強圉敦牂乃正元日觀族孫琪乾道之章志淳而理該差彌人意猶懼其體之未切也爲之推衍先儒
之說或可爲進學之助知道者不足觀也

於穆乾道其德曰元萬物之始萬化之端氣行在東於時爲春天命人受於性爲仁君子體之衆善之歸
於穆乾道其德曰亨萬物之通達元之生嘉百會南陽極而陰恭敬退讓禮云禮云君子體之抑抑威儀
於穆乾道其德曰利利匪己私生物之遂斂華就實禾黍嶷嶷義以制心大分斯得君子體之萬事之宜
於穆乾道其德曰貞物理備具物生之成天紀回復爲時之冬爲性之智藏始於終君子體之正固弗移
於穆乾道德曰剛健一息不停萬古旋轉維健維行剛斯可見雲行雨施乃化乃變君子體之有強無勸
於穆乾道德曰中正寒暑代謝無有偏勝當消而消當賊而賊正或未中惟中無病君子體之卓然有定
於穆乾道德曰純粹體用渾然具美全懿邪惡莫干陰柔莫媚時曰至誠眞實不僞君子體之精一無二
於穆乾道是曰三陽爲夫爲父爲君之常是曰父天是曰子剛下濟而泰光明四方君子體之吾道斯昌
於穆乾道君子體之終日乾乾烏可已而勇猛精進窮理致知獵險摧剛萬里載馳須臾不力明命斯應

古賢像贊并序

先祖侍講。平時無玩好。守鄱陽日。於洪丞相家。摹傳古賢像六十餘軸。皆紙本也。其原出於祕府。有手澤題其上。不幸收藏太密。蟻蠹幾盡。得全者無幾。而又散留它位。某舊嘗傳寫二十餘本。初未之奇也。舊本既失。益可寶愛。近囑潘伯遠篆題其姓名。暇時因各贊數語。懸之素壁。典刑凜然。六一居士嘗謂七寶圖。歐陽氏之舊物也。且使子孫不忘先世之清風。某質凡學陋。固不足以發揮往哲。抑以寓高山仰止之詠。尙庶幾來者識先世之清風云。

郭汾陽

巍巍令公。再造唐室。膽量包海。赤忠貫日。大姦莫間。大兵莫危。名將接武。皆帳下兒。

陸宣公

年少得君。同濟大難。朝奏夕疏。仁義炳煥。山東聽詔。感泣諸叛。前魏後陸。時不正觀。

韓昌黎

唐文三變。至公而止。日光玉潔。八代披靡。諫佛骨疏。上時相書。千載是非。其嚴矣乎。

柳河東

文盛正元。鏗鏘皇雅。絕壑峻崖。古匣玉珥。從游一誤。再片不歸。羅池之上。秋鶴與飛。

趙韓王贊

五閭將曉大明赫然抑抑人傑佐命之元功銘玉鉉名注金縢風雪夜計一新乾坤
曹周王彬

帝王之將翼義羽仁汎埽氛祲活布陽春雷歸電熄天宇清明不矜不伐流慶殷殷
李文靖沆

風範端凝魯論翼治識遠慮深鎮浮遏銳時雖昇平日陳災異歿久言存君猶追記
王文公旦

鬱鬱三槐陰覆萬宇直幹承天屹然八柱棲鸞停鵠蓄雲洩雨穆如清風作宋申甫
寇忠愍準

有倬萊國恢恢廟謨濟川之志到海之符青衫瘴雨竹栢靈敷澶淵一擲千載偉夫
張忠定詠

雲出華山雷厲西土以奇制變以神鎮撫猶恨承平閑殺尙書勁節獨步冰霜凜如
王沂公曾

溫溫沂公大志厚德桃李成蹊春風無迹計折姦回理化后戚宗廟之器揚休山立
呂文靖夷簡

賓日天聖。政關簾帷。起賢引黨。慮遠防微。月殿濟權。玉棺破惑。舒卷屈伸。深哉仁術。

范文正仲淹

雪壓孤根。斷蠶力學。危言正色。蹇蹇諤諤。靈府兵精。氈裘膽落。先天下憂。後天下樂。

韓魏公琦

堂堂魏公。受天間氣。赫奕孤忠。鎮定大器。手扶日月。身佩安危。大沛霖雨。寂然神機。

富鄭公弼

慶歷人望。元豐老成。片言折虜。訪落戒兵。恩浸南北。壽配岡陵。鶴降星殞。始終之靈。

文潞公彥博

元祐黃耆。翼日導乾。出將入相。餘五十年。虎老風壯。松壽節堅。龐眉瑞世。遐福不褻。

曹文穆璋

侍中內舉。器識迥殊。預勉樞輔。逆料胡鵠。風熄狼煙。霜凝金鉞。襲慶將壇。矯矯聲烈。

狄武襄青

太平名將。偉哉氣節。卻梁公像。留鬢邊湟。西折元昊。南摧智高。童謠方息。角大成妖。

歐陽文忠修

學授孟母。一代文宗。追琢大雅。剗滌澆蹤。諫疏直筆。雪壑霜空。全節蚤退。潁水清風。

蘇武公賦

奎宿精神。烏臺繅綫。神龍追電。天馬汗血。世外文章。筆頭風月。航海而南。平生奇絕。

林和靖

野人雲臥。孤山蒼蒼。梅侑逸興。香滿詩囊。湖邊竹中。猿鶴徜徉。寒泉秋菊。千載耿光。

醉吟先生白居易

江州司馬。元和諍臣。雞林聲價。蠻殿規箴。蠻素去矣。詩酒陶情。西湖浩渺。雲水流馨。

宗忠簡

雙龍遐驤。風埃帝邑。秉鉞齋壇。揮涕戮力。天聲外揚。臣姦內抑。忠憤莫紓。孔明祖述。

岳王

赫赫武穆。天開駿功。聲震河洛。威吞犬戎。梟檜忌武。烏臺勘忠。齊名諸將。愧死英風。

張魏公

中原雲擾。閫外專征。東遺淮楚。西敗富平。勢裂南北。天摧大勳。千載公議。一點忠誠。

魯齋集卷之九

上蔡書院講義

聖人垂世立教。具存典則。先賢明道講學。則有正傳。惟其傳得其正。然後不失其典則也。自孟氏歿。聖遠經殘。學絕教弛。其所謂士。縱橫乎戰國。刑名乎秦。黃老乎漢。夷狄乎晉。漢隋唐。至我朝周夫子勃興。建圖屬書。根極要領。上接洙泗千載之統。下開河洛百世之傳。是以二程夫子推廣其道。以教學者。必以持敬致知爲入德之門。其言曰。涵養須用敬。進學則在致知。須用云者。此決定不可易之理。則在云者。謂致知之中。卽進學之地也。其高弟上蔡謝先生。則曰。是以君子大居敬而貴窮理也。大居敬云者。如居處乎此敬之中。大莫大乎此也。貴窮理云者。必窮極其理之所至。貴莫貴乎此也。其指示學者。最爲親切。夫敬者。心之貞也。此徹上徹下之道。聖賢之本也。蓋心爲活物。乘氣機而出入。凝冰焦火。淵淪天飛。亦危矣哉。不有所統攝主宰。其德消亡。而天命亦幾於息矣。而其所用工者。諸老先生嘗備言之。學者先須識得敬字分明。然後有以持守。曰。主一無適者。敬之本體。以存主言也。曰。整齊嚴肅者。敬之氣象。以操持言也。曰。其心收斂。不容一物者。以貞體此敬也。曰。戒謹恐懼者。以畏體此敬也。曰。儼若思者。以容貌體此敬也。曰。常惺惺者。以不昧體此敬也。文公敬齋一箴。正是鋪敘持敬工夫節目。第一章言其靜之無違也。第二章言

其動之無違也。第三章言所以正其表。第四章言所以正其裏。第五章言其無適也。第六章言其主一也。第七章以動靜無違表裏交正。總括一篇之大意也。第八章慮其工夫之間斷也。第九章慮其工夫之差舛也。分明畫出一箇敬字。四方上下。斷截遮闌。更無透漏。工夫益密。學者苟有志於持敬。固不患其不知用力之方矣。知者。心之神明。妙衆理而宰萬物者也。物之理有所未明。則心之知有所未盡。大學所以使人窮物之理。極吾之知。程子言格物之道。或讀書講明道義。或論古今人物。而別其是非。或應接事物。而處其當否。皆窮理也。雖此三言。包括已盡。先後之序。又有不可紊者。必以讀書居于先。應事接物居于後。蓋應事接物之當否。此一節最未易到。初學者。且當以讀書爲主。雖事物物固皆有當然之理。與其所以然之故。不讀書。則無以識其事物物之則也。自堯舜以來。聖賢千言萬語。載在方冊。皆經世之準度。爲學之綱領。若憑虛而暗索。躐等而要求。無由可以致其知。必隨章而玩味。必逐句而精考。胸中之權度稍定。是非邪正之大分漸明。然後可以評古今。論人物。參伍而觀。錯綜而證。而後應事接物。庶乎裁處剖決。周流圓轉。無不中節。更練愈深。義理愈瑩。無往而非窮格之工也。先後之序。井井有條如此。上蔡先生以爲窮理只是尋箇是處。朱子又詳陳其窮理致知之條目。見於大學或問之中。謂極其心之本體無不盡。然後謂之知至。學者苟有志於致知。固不患其不知用力之方矣。程子又曰。入道莫如敬。未有能致知而不在敬者。蓋涵養本原之功。所以爲格物致知之本。先後之序。又極其精切如此。上蔡先生謂常惺惺。

法。正訓敬也。敬是常惺惺之法也。敬則此心光明洞徹。動靜語默。酬酢萬變。無不得其當。其中卓然不與之俱往。此敬之効也。不敬則此心昏昧怠惰。人欲肆而天理微。物交物引之而去矣。則遂失其正。此不敬之驗也。是故君子必存養於未發之先。省察於將發之際。端莊靜一之中。此敬也。應事接物之間。亦此敬也。講明道義。非敬則若有若亡。議論古今。非敬則或是或非。以至於人倫日用之常。非敬則乖違舛逆。無一中節。故伊洛以來。拈起持敬致知兩下工夫。不可偏廢。實爲相須。蓋不知則不能得持敬之方。不敬則無以爲致知之本。所以謂前賢明道講學。自有正傳者。此也。抑嘗觀大學之言正心誠意。此卽居敬之功也。至言致知格物。又窮理之要也。鄒孟氏盡心知性者。窮理之謂也。而存心養性。則又居敬之道也。至中庸所論致中和。而天地位。萬物育。是又居敬窮理功用之極致。歷考魯鄒伊洛垂教傳心之妙。其指要綱領。莫不若合符節。而上蔡先生顧以一言舉之。明白端的。了無滲漏。是豈非百世學者造道入德之指南乎。恭惟聖天子尊崇道統。表章正傳。學校之外。書院幾徧天下。何其盛哉。在昔先朝。以安定胡先生之書院。推廣其規模。設爲州縣之學校。今雖有州縣之學校。又收斂其規模。爲四方之書院。同師孔孟。同尊周程。同爲國家長育人才之地。初無異也。此蓋上之人作成教養。無所不用其至如此。詩曰。鳶飛戾天。魚躍于淵。愷悌君子。遐不作人。此文王之所以爲文也。前使君以此邦獨未有書院。於是追前賢以植風聲。拓黌宇以來衿佩。所以興起人心。汲引後進。仁矣哉。得爲政之大本。先生有曰。同聲然後相應。同氣然後相

求。今賢使君以師友淵源之懿，盡承流宣化之職，以聲氣上求先生之心，亦以聲氣下求爲學之士，道同心同，感應之妙，自有不容言者。夫子曰：雲從龍，風從虎，亦各言其類也。惟天台地靈人傑，迪關雎之教，爲袞繡之鄉，衣冠文物，獨爲東南之望。又有先輩遠庵諸老先生，親傳考亭之學，流風餘韻，薰蒸漸漬，不爲不久。深山長谷之中，陋巷窮閭之下，豈無抱道蘊德，深藏不願人之知者？聲應氣求，必有幡然而起，相與講求。先生所謂大居敬而貴窮理者矣。柏雖不敏，願與諸君相勉焉。莘莘實下工夫，謹毋失先生切問近思之學，故不敢躡等及於高遠，幸毋易之。

古易音訓

予暇日校正音訓，而有未能釋然於可疑者。久之，方悟成公之謹於缺疑也，善於復古也。所謂古文者，今亡矣。昔劉向嘗以宮中古文易扶施雠孟喜梁丘賀三家，多有脫落，獨費氏經與古文同。鄭康成、王輔嗣固皆出於費氏。今之易卽古文易也。今易之字，則非古文之字也。況籀篆既更，隸王益異，轉相傳寫之訛，豈能盡合於古哉？晁氏既不見古文，易今所按古文，不知其何所據也。姑以古之異同者言之。今之若古之巽字也，以爲當從古也。凡經傳皆書此巽，宜也。向乾以下，旣更此，若獨於離卦出此二巽，豈不可疑乎？趾之爲止，誠古也。或加足，或去之，亦豈有二義哉？拯之爲承，亦古也。而又不一於承，何也？聚之爲取，鮮之爲眇，未嘗盡出於一。如亨享佑祐之類，尙多有之。若喪之與喪，非有大異。特筆法互有得失，而成公豈不

能訂其是而歸于一乎。缺疑存古之道。不當若是。此成公所以一循其舊也。其大不得已者。天一地十章。移在天數五之上。此則存程子張子之言。有不容不移者。今成公於字音。因晁氏之舊。而增廣之。異同之間。不敢輕加一字。謹之重之。如此之至也。乃於千載傳襲不疑之書。銳然撥亂而反之正。則其不可不復古也。審矣。晁氏先於復古者也。成公豈苟從者。志偶同也。至於訂古有未盡善者。則成公亦不得而盡從也。曰古字。曰今字。曰籀字。曰篆字。曰隸字。分別若甚精。訂定若甚確。徐而考之。蓋亦未能盡合乎法也。至以卦氣斷其字之是非。有無。此則不能不疑也。抑嘗思之。不有音訓類其同異。則不知諸儒之得失。不見諸儒之異同得失。則不知伊洛以來。傳義之精也。音訓之有益於後學如此。知其所以異。而能察其所當同。而後可以謂之善觀。今大綱領既正。音訓甫畢。而成公夢奠精神。全在卷第之下。分行註中。讀者尤當留意焉。

汪功父知非稿

萬事無不由學而至。惟詩未必盡由於學。其工可學也。其氣骨實關於人品。朱文公獨愛韋蘇州詩。以其無聲色臭味爲近道。此言不特精於論詩。尤學道者之要語也。自三百篇以來。獨平澹閒雅者爲難得。夫平澹閒雅者。豈學之所能至哉。惟無欲者能之。非無欲之詩難得也。正以無欲之人難得耳。吾於功父之詩。似覺微有此氣骨。若充之以學。庶此氣骨開張完固。而駸駸乎成矣。一日以知非稿見示。而予得以審

其是非作之者固欲知其非而觀之者蓋欲知其是予方定其端以待功父學之成它時會有識者符予之言

禱雨劄子

伏聞某官憂農閔雨。靡神不宗。而又禱祈於社稷。於義尤爲至當。蓋社者實山林川澤邱陵墳衍原隰五土之祇。而后土勾龍氏其配也。稷者實專於原隰之祇。能生五穀者。而后稷周棄氏其配也。自昔國家所以昭事祈報莫重於此。與其屈膝於老子釋氏之祠。與夫妖妄淫昏之鬼者。相去遠矣。愚又聞天子祭天地諸侯祭其境內之山川。今用黃冠之教。而上供其皇天上帝。是禮之僭也。又以髡緇夷族。旋繞廁穢於宣布教化之庭。是禮之亂也。至于職分所得而祭。於禮爲正者。則前後未有能舉而行之者。誠爲缺典。夫山川所以爲神靈者。以其氣之所蒸。能出雲雨。潤澤萬物故也。今東陽之爲郡。北山奠其後。雙溪媲其前。此所謂境內之名山大川是也。愚自兒童時。每見北山有雲冒其巔。須臾必雨。雨則滂沛。周于四境。近年以來。雲雨多興於南山之西。而所及者有限。蓋陰倡而陽不和。其氣逆而勢不順。縱有豐年。而東北常歉。蓋北山者一郡之望山也。今其氣鬱亢久矣。誠得賢使君立其壇壝牲幣之制。考其登降奠饋之節。躬率僚案。精白嚴事。必有昭應。夫人之於天地。均一氣之流行。然是氣無所攝屬。則決無感應。蓋天子命諸侯。主是山川。以蒞其人民社稷之事。故其氣屬我。相聯接而無間。夫山川者。天地之正氣也。人以正氣感之。

則正氣應以戾氣感之。則正氣不應矣。苟能正其祭祀之本。先須正其感召之氣。凡政事之淹鬱者。疏剔之。凡征榷之苛急者。寬弛之。使千里人民之氣和。而山川之氣已漸和矣。然後齊肅一心。積蓄誠意。會山川之氣。通幽顯之神。何所禱而不應哉。昔南軒張先生。嘗行于桂矣。試取文集觀之。信不誣也。輒不自揆。以書生迂闊之言。恐可以裨贊愛民。事神之盛心。如或可采。願勉強行之。

水災後劄子

竊惟婺女之爲郡。三面阻山。而太末之水。限其西南中間。沃壤甚狹。豐年樂歲。僅僅自保。國家無兼歲之儲。上農無半年之食。一遇水旱。上下俱困。今年陰沴馮陵。西疇告病。橫風淫雨。浸蕩於其外。螟螣蝥賊。蝕囓於其內。烏菰槁粒。一目百里。雖無涇水。亦爲凶年。況七八月之間。山裂石走。百川沸騰。五邑狂瀾。會于一夕。傾覆我室廬。漂蕩我家具。淪沒我稼穡。闕絕我民命。橫尸被野。冤氣蔽天。雖咸淳。亦不如是之甚也。此豈小故哉。死者。吾末如之何。而生者。日就溝壑。尤爲可念。伏惟某官。任父母斯民之責。推己溺己饑之心。散財發粟。徧加拯恤。德至渥也。旣而申奏朝廷。大捐稍廩。賊出泉符。使者跋履。巡按官吏。奔走山谷。所以慰勞給助。恩已醲矣。然識者之慮。無餘憾於今日。深有憂於方來。何者。膏腴在下而瀕溪。磽瘠居高而帶山。下者宜秬。宜粳。宜秫。高者宜粟。宜豆。宜油麻。又其次。則蕎麥。芋果。蔬菹。幸免十不二三。蓋濱溪者。洪水之所匯。帶山者。洪水之所發。浸者成芽。沒者就槁。衝突者砂石。縱橫者陵谷。易位凶年之禍。未有如是。

之慘者。來春糴價翔踊。細民艱食。已無可疑。講行賑濟。又將次第而舉。然賑濟於今日局面。與去歲不同。蓋承豐穰之後者易。承凋瘵之餘者難。吾邦自庚子之春。講行勸分。于今三年。一舉而民猶樂從。再舉而民力已竭。三舉則元氣必絕矣。是以講行於吳侍郎之時。不勞趣辦。上下歡然。講行于趙都承之時。科擾程督。費力殊甚。講行於今日。實無良策。蓋富家巨室。赤立以待新令。先有啼餓之憂。況弱戶乎。是故勸分之令。難以復舉。夙夜以思。惟有籲哀朝廷。歸命君父。撥借四五萬石之米。俟來春糴錢椿積。秋成糴還。朝廷決不以煩瀆爲罪。本州又作急那融四五萬石之資。日下差官收糴於浙西。俟將來賑糴訖事。此錢亦不患耗折。但浙西晚禾將熟。趁發運司。未下知糴之令。則數萬石之米。攬先收拾。止浙西一二中戶。從容可辦。此其次也。大抵凶荒之餘。必有盜賊攘奪之患。計出無聊。勢使然也。但得乞米之奏。轉糴之官。卽日就道。便可徧諭鄉村。告以此意。使百姓知官司既加振業于前。又有措置於後。必無貴糴之憂。必無流莩之慮。徘徊顧籍。邪心自消。然後糾結保伍。申嚴號令。按逐苛刻之吏。禁戢暴橫之民。庶幾千里之愁嘆。自銷。國家之根本益固。誠非小補也。

朋友服議

咸淳戊辰臘月十有九日。夜承北山何先生之訃。次早排闥往哭之。既斂。僕雖以深衣入哭。隱之於心。疑所服之未稱也。自吾夫子之喪。門人不立正服。乃以義起。若喪父。而爲心喪。程子曰。師不立服。不可立也。

當以情之厚薄。事之大小處之。若顏閔之於孔子。雖斬衰三年可也。其成己之功。與君父竝。其次各有深淺。稱其情而已。僕於北山。受教爲甚深。豈可自同於流俗。因思儀禮喪服。有朋友麻三字。此豈非朋友之服乎。鄭康成云。朋友雖無親。有同道之恩。相爲服。總之經帶。又曰。士以總衰爲喪服。其弔服則疑衰。疑之爲言。擬也。總麻之布十四升。疑衰十五升。卽白布深衣。擬於吉服也。蓋總衰服之極輕者也。他無服矣。止有弔服。所以擬之。註云。弔服加麻。其師與朋友同。旣葬除之。疏云。以白布深衣。庶人之常服。又尊卑未成。服以前服之。故庶人得爲弔服。素冠吉履無絢。其弔服圖云。庶人弔服素委貌。白布深衣。士朋友相爲服。弔服加麻。加麻者。卽加總之經帶。是爲疑衰。或曰。深衣吉服也。而可爲弔服乎。僕曰。註固已云。疑於吉服也。況非止爲弔服。親疾病時。男女改服。註曰。庶人深衣。又曰。子爲父斬衰。尸旣襲衣十五升布深衣。扱上衽。徒跣交手哭。是孝子未成服。亦服深衣也。或者又曰。安知深衣爲弔服。不爲麻純乎。僕曰。純之以彩者。曰深衣也。純之以麻者。曰麻衣。純之以素者。曰長衣。以彩緣之。袖長在外者。則曰中衣。各自有名。不可亂也。又曰。子創爲此服。豈不驚世駭俗。人將指爲恠民矣。僕曰。以深衣爲弔服。鄉閭亦間行之。但未加麻耳。是服也。勉齋黃先生考之爲最詳。其書進之於朝。藏於祕省。板行于天下。非一家之私書也。遵而行之。豈得於過。僕於北山成服日。服深衣。加帶經。冠加絲武。卽素委貌。覆以白巾。見者未嘗以爲恠。越數日。通齋葉仲成父來弔。僕問昔日毅齋之喪。門人何服。曰。初遭喪時。朋友以欄幘加布帶。其後共考儀禮。至葬時。

方用深衣。加絰帶。僕於是釋然。知其無戾於禮也。故作朋友服議。

大庾公世家

天地變化。后皇妙合。有五子人。曰混沌氏、赫胥氏、若木氏、金天氏、中央氏。帝出乎震。木德先王。封若木於東方。賓出日。啓土功。掌萬物之生。列受姓氏。爵爲上公。子孫繁茂。散居四方。有三萬八千種。其顯者有柏皇氏、栗陸氏。其餘材器皆足任使。惟不失若木氏作酸之正性者。獨梅氏之宗焉。梅氏二子。長曰不次。曰仁。不字伯華。仁字仲實。伯華者。精神玉雪。德馨遠聞。風霜不得而摧沮。東皇不得而料理也。故世世以風節自高。仲實者。生意滿腔。敕身堅若。方其青純年少。世味生澀。遇之者裂吻蹙額。縮舌憊齒。及其體胖德老。衣狐裘。佩金玦。色和氣溫。時人美之曰。樂只君子。遐不黃耇。旣而祚國於燕。被玄衮。與魯成共治。正天下。精淳濃郁之味。養民生日用之和。與聖人同功。在武丁時。得傳說爰立作相。以代成命。之曰。昔甘盤虛己受和。惟咸惟仁。交濟厥德。沃朕心。用協調于萬邦。爲治若和羹。爾尙試乃前猷。允協于中。罔俾咸仁。專美于我有商。後世稱賢相者。皆咸仁之緒餘云。五世孫標。仕召南爲大夫。佐文王之化。男女得以及時。詩人歌之。周公采而次之。國風用之。於閭門。鄉黨。邦國之化。天子思標之績。徵其子。獯俎豆乎祭祀賓客之間。俾修其祖業。裂江南之地。封之。襲若木之爵。都于大庾。初。孫卉仕王國。與栗陸氏之後。同封爲嘉侯。以病坐廢。依終南之族。不遷。遂分南北枝。周衰。秦一海內。大興宮室。渡渭屬之咸陽。荒淫怠政。事皆決於

咸陽舉若木之族。而悉焚之。昔之被服青黃丹堊之榮者。皆煨燼之末。秦尙才棄德。而梅君幸無以材稱者。伶傳礪谷。固自若也。雖免於難。而蕭條亦甚矣。於是南枝獨盛。北枝寒落。漢一再傳。晁錯用事。假托臭味。疎間骨肉。腥穢東南。大庾之裔。不復登廟堂。浮沈于世。爲黷士。染人治人。輩之所敬事。曹操引兵迷道。三軍病渴。獮之雲。仍有名林者。避世山澤。操詭於衆曰。吾引若等見林矣。軍士津津然喜躍。名重當時。尙如此。嗣伯華者。卒不偶於三代盛時。歷漢魏亦無聞人。當宋文帝陸凱落南。見名春者。字一之。玉立壠首。驚喜歎賞。采驛薦之上國。天下始知名。又有莊名者。風姿清麗。尙武帝壽陽公主。副笄六珈。充耳琇瑩。光彩莫比。時人榮之。然伯華之風流醞籍。高蹈塵俗。蕭散孤特。喜徜徉於深山絕谷。斷橋流水。竹籬茅舍之外。與雪月爭妍。雖與徂徠十八公。渭上蒼庭筠。爲莫逆之交。然二子者。徒耐歲寒。不改其操。當是時。英彩煥發。清芬滿天地。二子拱手下風。不敢班也。後世乃有如莊者。慕富貴。失身帝王家。伯華之家聲頓減。一宗含垢長往。唐宋文貞公鐵石心腸。爲時端人。伯華之枝。始有出而與之交。自是騷人詩士。爭先延致。苟非其人。語言無味也。至我本朝。如蘇黃輩。傾心從游。播之歌頌。惟處士林和靖。有暗香疎影之句。識者以爲善於形容。夫以冰清玉潔之姿。雅度孤標。與騷人詩士。醞風醉月於荒寒寂寞之濱。聲音氣味之孚感。宜也。自三代以下。未與有道者交也。引而置之莊岳之間。自伊川程夫子始。夫子中興聖學。英材萃門。嘗

進梅生藻而與之言曰。子知萬物之榮枯乎。此陰陽升降之大節也。然逐枝逐葉。自有一榮枯。蓋各有一乾坤也。藻曰。物物各有一消長。亦不外乎一大消長。此理一分殊之謂乎。夫子莞爾而笑曰。藻也。始可謂言道也矣。梅生得聞大道之要。頗有矜色。同門有龜山楊先生者。深戒之。俾其好藏清豔。由是涵養益粹。紫陽朱夫子一見如故人。有尊中句裏。說盡心期之語。南軒張先生識于長沙王令尹坐上。自謂平生佳絕。無以踰此。往往因伯華而思仲實。慨然懷古於鼎味之中。遙遙世胄。人咏其德。久而不忘。根深本厚者如是哉。東海之外。眞臘之虛。有隱士者。黃衣紫裏。清聲聲響襲人。慕梅君之令聞。願爲假子。風骨絕不相似。世人安之而未察。又有名梁者。世傳其嘗佐禹治水。能興雲雨。越人祀之。其言荒誕。君子不取也。史臣曰。梅氏之先。有二族。一在商末。封爲伯。以忠誠諫紂。爲紂所醢。屈原賈誼深悲之。漢成帝時。乾綱解紐。九鼎將移。南昌故吏名福者。乞斬佞臣頭。而姦邪爲之縮頸。至我宋有名堯臣者。與六一居士爲金石之交。以詩文稱。而忠諫不逮。吁。何其寂寂也。伯華仲實之後。盛衰不齊。毋足怪者。獨以愛華棄實之際。於此可以觀世變。近世好奇之士。又訪梅君之長老耆龐。龍鍾稿項而黃馘者。爭貴重之。華實之衰。不問也。此又世道之一變。後世鼎鼎不調。尙僞忘眞。至以鼻吸斗酢爲相業。獨魯咸子孫。衍裕於天下。廟堂之上。日夜思所以重其聲價。爲國家之大利。乃以回天下精淳醲郁之味。以養民生日用之和。爲不急之腐談。嗚呼。人莫不飲食也。鮮能知味也。

託物作史。以文爲戲。自韓昌黎傳毛穎始。當時貪常嗜瑣者。咕咕然動其喙。笑以爲怪。惟柳柳州奇之。又有革華傳。非韓筆法。它人竄入無疑。至坡公乃作羅文葉嘉黃甘陸吉江瑤朴諸傳。屏山劉公亦有蒼庭筠傳。李忠定公又有武岡侯。文城侯。文信侯三傳。亦各有寄興焉。予與大庾公。託契舊矣。病暑無與語。遐想風致。爲作世家。其源深流長。有不容不盡著見者。未必怪也。終自媿其常且瑣耳。

六義字原序

學之不古也。無一事得其正。字爲學之始。不得其正。尤甚焉。自皇頡史籀之制作。大壞於斯邈之手。由是說增訛而謬生謬。展轉相因。文義舛鑿。最爲學大病。書之六義雖晦。而六書之名。幸未湮沒。後人猶得以有所考。古人自小學則已識其大要。今之老師宿儒。猶未能究其彷彿。蓋高者留心於道德性命。而不屑爲下者役志於功利進取。而不暇爲。故字學終無時而復明也。中間一二儒者。振意復古。而不本六義之旨。則文字之源流。音訓之本末。何所折衷哉。古今字學之書。亦不爲少。惟許叔重說文。簡古詳備。亦坐六義之未精。而子母混雜。識者未深許之。後又有古文尙書行於世。名固可尊也。而字實非也。漢儒不識古文。猶能曰。獨體爲文。合體爲字。文固母也。字則子也。一字之中。既合二體。或三四體。必有一體爲母。子承母。天下之大義也。今觀其所以取爲母。又多其子焉。與母抗行。則於漢之法度。已不能守矣。夫六義者。惟象形指事。當然爲母。蓋制字之義。始于象形。形不可盡象。而後屬之事。事不可盡指。而後屬之意。意不可盡會。而後屬之聲。曰意。曰聲。固非一體。則不可得而母也。明矣。曰轉注。曰假借。尙有屬之母者。然母有不生。而子或生生不已者。不謂之母。又不可也。所謂本同而末異。源一而派分。此聖人所以立大宗小宗之

法焉。惟大小宗之法不立。故子母所以混淆而不分也。有能立宗法。以定其生生之本。于每部之中。字字訂核。別爲何義。其俗書亂政者。悉從而明辨之。豈不爲字學之大幸。惜未有肯任是責也。近世南山甘谷子倪孟德父。留意於此有年矣。書未脫稿。他時足以名家。柏學識荒陋。雖未上知道德性命之奧。而下則免於功利進取之累。故暇日猶得游神於偏旁字畫之微。每有望洋之嘆。嘗讀易大傳曰。古者包羲氏之王天下也。仰則觀象於天。俯則觀法於地。觀鳥獸之文。與地之宜。近取諸身。遠取諸物。於是始作八卦。以通神明之德。以類萬物之情。愚切謂太極兩儀四象八卦者。其畫之始而字之原乎。于是推此又爲制字之端。姑以許叔重所立字母五百四十字。先以六義分之。則每部之內。字字亦可以類推也。參之以賈昌朝之音辨。鄭夾漈之假借。五世偏旁之考。而甘谷之六書本義目錄附焉。因輯成編。將求正於好古博雅君子。紫陽子朱子常曰。字畫音韻。是經中淺事。先儒得其大者。多不留意。然不知此等不理會。卻費無限辭說牽補。而卒不得其本義。亦甚害事也。愚亦未知其有合於朱子之意云。淳祐元年陽日。

唐致政詩跋

予自兒童時。已知有鄉之尊老曰致政唐公。亦間嘗得侍杖烏。聽話言。兩臉如丹。雙瞳如漆。步履如飛。和氣郁然。予固未嘗不起敬。而莫知所以請教也。後得見公自壽之詩曰。君欲問予年。八十有七。百歲十分。

明兒置赤松。蕭然默坐于山水間。忽遇異人。兩目豁然。自是始歸取科第。得祿以養母。仕宦所至有聲。未
衰輒掛冠。享上壽。骨健神清。挺然故家之喬木。而巍然宗廟之大蔡。予因是有感而嘆曰。禍福不常。得失
難料。顧所以自修者。如何耳。方公蕭然默坐時。自分病廢。百念俱息。天君湛然。何有于世味。則其所以警
而明。養而祿。仕而聲。壽而健者。豈有他哉。卽此時便是養生之要訣。其修身俟命之要旨。亦在此也。人之
所以耐富貴。溺聲色。傷生喪節。靡靡成風者。正墮蔗境之甜耳。有能咀嚼公之詞。澹然太古之餘味。可以
見義皇而共安期矣。陳氏子元紹。一日出示此卷。墨色清勁如新。跋者已備公之懿行。予不復述。止原公
所以得壽之理而已。後生能保愛家藏。而尊尙之。志亦高雅。推此志而不倦。進德可量哉。

答王景梁

昔往南溪攀別。而逸駕竟已先驅。悵然而返。耿耿至今之日。伏奉手筆之光。慰感柏懷。謙詞滿紙。推予過
情。此則非所敢當。宗兄坦夷磊落。刻厲辛勤。青雲之科。不占已孚。舉業如是。足矣。邇此青春鼎盛。盍亦用
工於根本之書。以培養其窮達之良心。開眼闔眼。無非受用之實地。記得朱子語錄中。有一段說用舍行
藏云。他人用無可行。舍無可藏。惟孔顏有以行。有以藏。于有事說得極重。雖未必當時聖人之意。於學者
警發有功。若夫家貧親老。別無妙法。只有進德修業四字。須是念念在心。以聖賢爲標準。蓋自古無餓殺
聖賢也。此某平生勸勉友朋之拙策。聞者莫不笑其迂。自謂忠於告人。莫出于此。若欲別求妙法。卽墮坑

落塹者紛紛皆是。審高明以爲然否。吾濟遠書諛語。彝儀皆在倚閣之數。併惟識察。

三姪字義說

寶祐癸丑之季冬十有一日乙卯奉伯氏命。挈諸姪來歸教養。越三日。進而告之曰。天之生是人也。莫不付之以仁義禮智之性。不以聖賢而加多。不以愚不肖而故少也。然託於此者爲氣質所拘。故有晦有明。爲物欲所蔽。故或絕或續。人之可以全其付託之初。而不爲氣質物欲所勝者。本學問之功歟。是以大學教人明明德。必曰如切如磋。如琢如磨。所以指其得之之由也。曰瑟兮僴兮。赫兮喧兮者。言學問之成。德容之晟。而歎美之也。其餘義理詳密。予將次第爲汝等言之。思昔汝諸父之孤。大略亦汝等之年。其間聚散晨衰。禍患事變。不堪回首。今何忍言之哉。自是以往。予日夜望汝等有所成立。以承門戶之付託。長姪當以學問率之。蓋有所執持。則自有毅然不可犯之威。故朱子亦以毅釋僴字。長姪先已名僴。今字之以毅。次名曰付。字之以子全。幼曰僂。古託字字之以子可。三子思其命名之義。而勉之敬之。以副予望云。

自題小像

石筍巖巖。曷培而崇。繡湖洋洋。曷浚而通。茫茫遺緒。耿耿爾衷。就融爾氣。就肅爾容。稜稜霜月。習習春風。匪範爾德。用警爾慵。

學貫天人道原洙泗得北山之正傳實考亭之嫡嗣折衷百家之言發揮千古之祕辯義利似是之非析物理秋毫之細周旋禮法之中步趨高明之地著書滿家師表百世堂堂乎雄偉之姿浩浩乎剛大之氣身雖終於隱淪志則存乎經濟顧末學之晚生緬淵源之所自敬仰德容載惕載厲洪武癸亥臘月既望范幹齋沐謹贊

魯齋箴有引

北山何基

王子會之名其齋曰魯既爲記以自警復俾其友人何基子恭父作箴揭之基謂王子非魯者也而自以爲魯豈不以昔者曾子之在聖門見謂爲魯而一貫之妙獨參得之蓋將從事於篤實堅苦之學以收曾氏之效也歟其志可謂遠矣乃爲之箴曰

維人之生均稟太極萬理森然咸具物則知覺虛靈是謂明德或蔽而昏則由氣質曷開其明曷去其塞復其本然惟學之力昔者子輿萬世標的始病於魯竟以魯得匪得於魯實學之績確固深純精察嚴密稽其功用有始有卒履薄臨深是警是飭日省者三猶懼或失講辨聖門是纖是悉戰戰兢兢寸累銖積誠明兩進敬義偕立一唯領會萬里融液彼達如賜乃弗能及孰謂參魯收功反亟卓哉王子追蹤在昔有扁斯名朝警夕惕勿病於魯謂質難易勿安於魯謂思無益由魯入道有曾可式氣稟之偏則懲則克義理之微則辯則析知行兼盡內外交迪確乎其志前哲是述人百已千明迺可必從而

上達則在不息滅裂鹵莽迺吾自賊歸咎於魯豈不大惑我作斯箴侑坐是勒勿貳爾心服膺無斁

寧庵記

朱子

侍講王公病革顧謂其子瀚等曰生之有死如旦之有暮蓋理之必然也吾幸晚得歸息故廬今又以正終牖下是張子所謂存吾順事沒吾寧者復何恨哉汝曹亦無過哀但兄弟友恭敬奉而母力學自立扶植門庭毋爲吾羞足矣語絕而逝諸子泣奉其教不敢違未幾而公夫人俞氏亦不起疾諸子旣奉兩柩合葬白沙石笋之原乃築祠堂庵舍以奉蒸嘗居守者而取公遺語命之曰寧庵買田百餘畝以給庵費輸王租而歛其遺餘以爲歲時增葺之備間以告子而請記所以名之之意予感王公之言足以見其所守之正死而後已又嘉伯海昆弟之能遵先志而不忍亡也因爲書其本末如此云新安朱熹撰

魯齋集附錄

葉由庚字成父義烏人少習舉子業試有司遂絕意進取從徐僑學著有論語纂遺詩文若干卷

壻誌

先生諱柏字會之姓王氏大父諱師愈事龜山先生受易論語後與朱文公張宣公呂成公三先生遊文公謂其有本有文德望隱然爲東州之重簡知阜陵親擢崇政講官以直煥章閣致仕父諱瀚與其叔季執經問難考亭麗澤之門克世其學官終朝奉郎主管建昌軍僊都觀先生其仲子也生於慶元丁巳八月庚寅州里世系已見文公所作煥章墓碑茲不著先生生稟高明抱負閎偉慕諸葛武侯之爲人自號長嘯欲以天下用其身年逾三十始知家學授受之原慨然捐去俗學以求道與其友人汪開之元思向讀四書取論孟集義別以鉛黃朱墨以求文公去取之意勉齋先生通釋尙闕論語乃輯錄精要足之名曰通旨一日讀至居處恭執事敬惕然曰長嘯名義非聖門持敬之道亟更以魯歷造考亭門人船山楊公攜堂劉公而請問焉船山語以北山何子恭父嘗從勉齋得考亭之傳卽往從之北山一見曰會之眞吾友也授以立志居敬之旨且作魯齋箴勉以質實堅苦之學自是發憤奮厲致人百己千之功有見有疑必從北山就正弗明弗措問答累數百帖每見北山以歸充然自得北山每稱之曰會之十二年工

夫勝他人四十年矣。先生自謂研窮愈刻深，則義理愈呈露，涵養愈細密，則趣味愈無窮，無一書一集不加標註，於四書通鑑綱目，精之又精，一言之題，一點之訂，辭不加費而義已著明，無非發本書之精體，開後學之耳目。手圖敬齋箴，畫出一敬字，爲日用躬行之則，夙興而起，深衣見廟，進止有儀，言動有法，綜理家政，統紀斬斬，戶庭閭然，御羣子弟，色莊辭確，毅然不可犯，平居酒不濡唇，食雖疎淡，必潔，當暑閉閣靜坐，子弟白事，非衣冠不見也，痛先世遺書流落，多方搜拾，整比成編，曰清風錄，各爲之題識，幼孤事伯兄恭敬友愛，惟恐少拂其意，中年同處，益盡和孺之樂，季氏早喪，孤寡來聚，綱維教育，一視無間，至割膏腴之田與之，從子偁剛仲力學有雅趣，知所尊事，通財遜畔，進與比居，一門自爲師友，共學交遊，蓋甚樂也，先十年卒，先生哭之慟，收宗合族，規模宏遠，儒不自立者，扶植之，貧不自立者，周恤之，施於朋友亦然，元思死，率朋友歛之，欲遂葬焉，其父不從，越十餘年，父死，始得與同窆，具述其志行，請銘于北山，以不朽之見義勇爲，不計有無，今人以爲難，先生則以爲常也，四方學者，至卽館之，久而不厭，隨其所學淺深，引誘啓迪，以開其適道之門，提綱疏目，析殊會一，未嘗不竭盡無餘，而與之言，叩者無窮，其出愈新，又編朱子指要示之，不以義理之精微爲之嚮望，欲先其近易，而達乎遠大，又舉文公曰大學分明，聖賢已是八字打開，今人卻向外面狂走，此編如千蹊萬徑，廣立墩子，使人人皆可造大學門戶，此先生教人之大要法也，士大夫之仕其鄉，扣請者亦語之曰，士生天地間，以萬物皆備之身，而不以古今自任，經綸自期者，皆

自遏其躬而已。先生愛人以德大率類此。庸齋趙公汝騰久軒蔡公抗平舟楊公棟來爲郡。歎曰：麗澤之有書院久矣，設而不作師，帥之恥也。皆以講席延聘先生，以北山未出辭。旣而部使者踵二先生之門，請益力。北山亦勉先生經始，而作成之。乃精生員之選，增養士之田，條列規畫，創製器服，廣置書籍，俾諸生誦習，作興於因，仍積弛之後，氣象煥然一新。上蔡書院落成，台守星渚趙公景緯介平舟，以書幣來聘。且俾鄉守趙公崇絢勸之。駕先生首講謝子大居敬貴窮理之訓。天台後學始得聞正學傳授之要。敷揚經旨，精粹瑩白，聽者竦然，意融心服。雖鄉之耆德亦執弟子禮來謁。遠近聞風，莫不競勸。理宗皇帝上賓，率諸生製古衰服，臨于郡。見者始識先王之禮爲永式焉。先生兩正堂席，以維張世教爲重。乖逢久速，一不以累其心。歸而講道于家。書堂學子懷慕不已，不遠數百里，面講書請，往來不置。晚年積厚養固，精強清勁，雖少壯有所不逮。孳孳述作，不知老之將至。今年夏五月，感微恙，瘳已踰月，忽謂子岱曰：吾大命不遠矣。手書曰：有生必有死，天地之常。予已大幸，年過祖父，無德可紀，不必作墓銘行狀。平生所編述，未經有道訂正，不可輕以示人。一夕，與江西學者論學，俄以倦就睡。戒子弟勿強我藥，自是不語不食者幾旬，垂沒。整衣端坐，揮婦女出寢門，惟子姪門人侍。夷然而終。時咸淳甲戌七月九日也。享年七十有八。諸生制經，行心喪禮。麗澤山長，率生員赴臨。天台書堂諸生或衰經爲位聚哭，或踰嶺阻奔赴。朝野莫不嗟惜。傷吾道之不幸也。先生學博而義精，心平而識遠，考訂羣書如千將莫邪，所向肯綮迎刃自解。凡文公發其

端而未竟。致其疑而未決。與夫諸儒先開明之所未及者。莫不該攝融會。權衡裁斷。以復經傳之舊。於易則謂伏羲則河圖以畫八卦。文王推八卦以合河圖。河圖者。先天後天之宗祖也。河圖是逐位奇耦之交也。後天是統體奇耦之交也。推四生數不動。以四成數而下上之上。耦下奇。莫匪自然。於是後天之義始明。大象者。夫子之經也。漢儒冠于爻辭之前。而後無所屬。尾于彖傳之後。而前不相承。乃倫比象經。次于彖爻二經之下。古之冊書。作上下兩列。故易有上下經。非以上下各自爲先後。合而觀之。自有精義。夫子作十翼。不應自著子曰字。其亦中庸之子曰乎。是殆子思參考夫子之言。而著爲二書。於書則謂大禹得洛書而列九疇。箕子得九疇而傳洪範。範圖之數。不期而暗合。洪範者。古今經傳之宗祖乎。定初一日五行以下六十五字爲洪範經。五皇極以下六十四字爲皇極經。先儒謂此乃帝王相傳之大訓。非箕子之言是也。於詩則謂今之三百五篇。豈盡夫子之三百篇乎。所刪之詩。容或有存於閭巷浮薄之口者。漢儒槩謂古詩。取以補亡耳。乃定二南。各十有一篇。還兩兩相配之舊。退何彼穠矣。其棠歸之王風。削去野有死麕。若風。若雅。若頌。亦必辨其正變。次其先後。黜鄭衛諸淫奔之詩。定爲經傳若干篇。於春秋。則謂文公雖無成書。而門人纂記。固已一洗歷代穿鑿之陋。乃輯爲發揮。以明春秋大義。於魯經。則謂聖人之言行。萬世之大經也。曰語曰子。不得與二帝三王之書並列。理宗皇帝命陸論語爲經。前是時。講官毅齋徐公。請錫名魯經。詔國子監奉行。與六經並。宰相指爲迂闊。不行。先生上承理皇光闡斯文之盛意。屬辭聯事。

集爲魯經章句。以大學、中庸、孟子爲之傳。且訂大學致知格物章之未嘗亡。還知止章于聽訟之上。謂中庸古有二篇。誠明可爲綱。不可爲目。定中庸誠明各十一章。其他正錯簡明舊旨。未易悉數。通鑑綱目書法。凡例不傳。極力搜訪。得諸天台趙氏。錢之梓。又考通鑑之初語。卽外傳之終語。知司馬公未嘗不拳拳於外傳。增加本末。附之論辨。首以魯經。終於五代。爲續國語。外至天文、地志、律歷、井田、旁及文章、字學。莫不各有論著。浚流沂源。會歸至理。所著述有文集七十五卷。讀易記、讀書記、讀詩記各十卷。讀春秋記八卷。論語衍義七卷。太極衍義一卷。伊洛精義一卷。研幾圖一卷。魯經章句三十卷。論語通旨二十卷。孟子通旨七卷。書附傳四十卷。左氏正傳十卷。續國語四十卷。閩學之書四卷。文章續古三十五卷。文章復古七十卷。濂洛文統二百卷。擬道學志二十卷。朱子指要十卷。詩可言二十卷。天文考一卷。地理考二卷。墨林類考十六卷。大爾雅五卷。六義字原二卷。正始之音七卷。帝王歷數二卷。江左淵源五卷。伊洛指南八卷。雜志二卷。周子二卷。發遣三昧三十五卷。文章指南十卷。朝華集十卷。紫陽詩類五卷。家乘五十卷。嗚呼。證古難也。復古尤難也。明道難也。任道尤難也。朱、張、呂三先生同生於一時。皆以承濂洛之統爲身任者也。張、呂不得其壽。僅及終身。經綸未展。論著靡竟。獨文公立朝之時少。居閑之日多。大肆其力於聖經賢傳。刊黜詩書之小序。紹復易、春秋之元經。定著論語、孟子、中庸、大學之章句。以立萬世之法程。北山、魯齋二先生同生於一鄉。亦皆以續考亭之傳爲身任者也。北山深潛沖澹。精體默融。志在尙行。詎於立言。

魯齋通睿絕識，足以窮聖賢之精蘊，雄詞偉論，足以發理象之微著，稔於北山講貫之素，精於有體有用之學，進有可行之具，退有可藏之資，倘使得時達道，則陳善閉邪，正心立極，豈不足以表儒效之卓，顧乃僅正麗澤聖則之皐比，陋巷堅坐，名聞益彰，近臣列其行義於朝，朝下郡守錄所著書來上，先生不以出迨嗣皇訪落，方有倚重耆碩之議，而先生已不及聞矣。一時之勲業有限，萬世之道學無窮，先生閱聖經之寢堙，憂聖賢之無傳，上自義畫，上逮魯經，莫不索隱精訂，以還遺經之舊，以承考亭之志，確乎其任道之勇也。或者乃謂經以講解辯訂而明，亦以釐析類合而陋，吁，是何言也。昔吾夫子之於詩、書、禮、樂，以其殘缺散逸之餘，經之綸之，然後各得其所。若但踵故襲訛，一無沿革，則亦無事於刪之正之矣。矧先生一更一定，皆有授證，一析一合，不添隻字，秩秩乎其舊經之完也，炳炳乎其本旨之明也，而亦何陋之有哉。先生題春秋發揮曰：吾夫子以大公至正之心，立百王之大法，千五百年爲諸儒刻鏤幾碎，至是始完且明，豈非天乎。朱子於諸經縷析毫分，殆無遺義，獨於春秋以渾然得夫子之心，是亦天也。卽先生之言，可以知先生之心，後之君子，因其詳於訂，而未輕於復，取而約之，勒成一代之巨典，以垂萬世之成憲，唐虞、夏、商、洙泗之書，至我朝而大完，堯舜禹湯、文武周孔之道，至我朝而大明，迺其所自，先生之功偉矣，則撫其言行，以詔方來，詎可略歟。其配樓氏，先二十七年卒，葬金華縣婺女鄉金村之懷原，至是始定同兆，圖其主向廣狹淺深之宜，就其子岱貽書其友葉由庚曰：今秋欲營藏身之所，誦百年同逆旅，一壑我平。

生之句。深有感焉。此地得之天賜。日者皆不許。亦任之耳。非人著力。得未祝。順天所命。以保養壽。實訣友絕筆也。甫屆秋。而先生夢奠矣。其誠精明達蓋如此。怙尊遺戒。以其終之年。十有一月甲申。奉先生之柩。合葬樓夫人之壙。一子。卽怙。一女。適迪功郎處州錄事參軍康道元。及葦而罄。秉志弗渝。怙以治命。不求誌銘。俾由庚敍次歲月。梗槩。由庚登門受教。不爲不久。未能得其遠者大者。何足以表章盛德。門人謂先生進而不獲施之於時。退而所以傳之於後者。或無考焉。是則吾黨之罪焉耳。矧子四十年從遊。知之爲深。其何可辭。乃爲具論言行本末。大致如此。而不自知其昧於識壙之體也。請刻而納諸幽。留其副於家。以俟異日太史氏之採擇云。

祭文

金履祥

維咸淳十年。歲在甲戌。十一月癸酉朔。越十日壬午。門人金履祥謹以清酌庶羞之奠。昭告于先師魯齋先生。堂長聘君王公之靈曰。文運重明。鼎盛乾淳。集厥大成。越惟考亭。考亭之亡。道散四方。鼇峯之傳。北山之陽。猗歟先生。世溯淵源。考亭遺書。力探精研。卒於北山。師資就正。有的其傳。立志居敬。方其少年。英邁無前。議取秦關。俯視中原。及旣聞道。悉歛豪英。克己似顏。弘毅似曾。攻堅鉤深。高視旁通。卽事卽物。無理不窮。論定諸經。決訛放淫。辯析羣言。折衷聖人。究其分殊。萬變俱融。會諸理一。天然有中。見其全體。靡所不具。度其大用。隨其舉措。表裏輝映。動止準繩。山立時行。肅然襲人。日明霜潔。玉栗金精。內明外齊。聞

門朝廷遇事理。棼神運權稱。如有用我。風飛雷興。出其緒餘。施諸造成。臯比所至。鳶魚高深。孰謂斯人。而不用世。晚益油然。行藏無意。廟堂羣賢。明揚薦聞。元祐訪落。伊川弓旌。如何昊天。不相斯文。如何先生。乃夢奠楹。隱居求志。行義達道。有如先生。乃隱弗耀。嗚呼哀哉。履祥登門。今二十春。轉迷起弱。弘編矯輕。進之北山。館我歲寒。施及其徒。鱗次朋升。昔我大故。貧不克葬。先生賙之。復視其壙。引義返正。師訓有嚴。始拘謬悠。卒踐師言。培養拓充。雖未克稱。環堵殯蔬。罔敢越隕。勉我力學。以大發揮。方期卒業。遠遊來歸。時夏請益。至已微疾。爲我坐言。不踰其則。謂喜介寧。竟聞淵冰。哀我茲今。有聞無徵。我思儀形。儼其如在。豈聞先生。而容有改。九二剛中。而不見龍。我懷先生。亦哀道窮。斯文不磨。先生不亡。獨奠以辭。鑒我哀恫。嗚呼哀哉。尙饗。

告謚文

金履祥

竊惟先王之制。生有爵以據其德。歿有謚以表其行。是皆命於天子。而太史定其賜。小史讀其誄。幼而不誅長。賤而不得誅貴。諸侯不得私相爲謚。至春秋之世。則國自謚矣。然鄉大夫之謚。猶命於其國之君。若夫生不能用。死而誅之。子貢猶議其非禮。下至漢晉隋唐。德或不見用。而爵或不稱德。於是清議在下。而朋友門人。始私謚其師。若陳文範。陶靖節。王文中。孟德耀之倫。是也。橫渠子張子之喪。關中學者。欲以明誠中子謚之。而溫公以爲非古。然則上遵朝廷已定之命。而下伸門人清議之公。此豈非古今之通議。而

濟世綜物。其著述規爲。足以解焚立度。雖道在經綸。而遠厭進取。雖名播縉紳。而安老陋巷。咸淳癸酉。侍從有列薦之章。迨至甲戌。先朝有特詔之義。先生固未必起也。而適不幸以卒。朝野惜之。於是國子祭酒楊公文仲。列請於朝。乞諡。北山何先生。追贈先生。仍乞一體賜諡。公朝敷奏。特贈承事郎。仍同賜諡。事下太常。以一德一心。踐行不爽。諡北山曰定。以廣聞多能。行善可記。諡先生曰憲。事上得可。已割付其家照應矣。然北山先生。有累命之爵。故諡告卽下。先生歿。有始贈之命。故贈告先下。又以一字之諡。乃七先生節一之例。而文公師。生上自羅李。下迨黃陳。例從二諡。上悉連文。所以明一原。盡衆美。故再加北山曰文定。已形詰辭。亦再加先生曰文憲。將頒後命。而警告日急。大勢阽危。禮文之事未遑。變故之來已極。自是以後十餘年。故舊彫零。生徒散失。大懼履祥等。一旦淪胥。上未能竟先朝之再命。下無以表清議之同尊。鬱而弗彰。無補世道。夫以先生盛德。追崇之禮。異世同符。固非有待。然近代門人。私諡其師。初非有待於請也。況有前朝之遺命乎。謹依省劄諡憲之明文。述朝旨加文之餘意。敬諡先生曰文憲。改題墓道之碑。式昭崇德。允終節惠。興起方來。永遠無斁。惟先生之神。尙歆受之。敢告。

